



Alumni UMP gah di Volvo

Oleh: WAN NAZRUL HELMY WAN MOHD ZAIN

Bermula dengan menjalani latihan industri di luar negara, akhirnya Hilmi Mohd Zahidi yang merupakan graduan Sarjana Muda Kejuruteraan Mekanikal (Automotif) telah berjaya menempatkan dirinya sebaris dengan jurutera hebat di luar negara apabila diberi peluang menjawat jawatan sebagai Jurutera Penyelenggaraan di Volvo Trucks, Gothenburg, Sweden.

Dipertanggungjawabkan untuk menyelia pengeluaran trak dan kenderaan berat di syarikat yang gah di peringkat antarabangsa bukanlah satu bebanan buat beliau.

Malah ia amat membanggakan sekali buat anak kelahiran Besut, Terengganu ini apabila dapat membuktikan ilmu dan kepakaran yang dimilikinya sepanjang menuntut di Universiti Malaysia Pahang (UMP) dipandang tinggi dan dapat dipraktikkan di syarikat gergasi tersebut.

Menurut Hilmi, keunikan sistem pembelajaran di UMP yang mempraktikkan latihan hands-on telah memberi input yang sangat positif dan amat bermakna sekali.

“UMP banyak memberi peluang kepada para pelajarnya untuk mengendalikan sendiri projek, eksperimen dan latihan di makmal

dengan menggunakan pelbagai alatan dan mesin yang canggih selama saya belajar di sana.

“Secara tidak langsung, saya dapat memahami sesuatu subjek dengan lebih jelas dan keadaan ini amat dikagumi oleh rakan sekerja saya yang mana saya dapat mengendalikan sesuatu projek dengan baik serta kelihatan seperti sudah biasa menggunakan peralatan tersebut,” jelas bekas Presiden Persatuan Mahasiswa Fakulti Kejuruteraan Mekanikal (MECHAPRO) ini.

Tambah beliau lagi, penglibatannya dalam aktiviti dan persatuan sepanjang berada di UMP turut membantu mengasah bakat kepimpinan dalam diri, apatah lagi pernah menyandang jawatan sebagai Presiden MECHAPRO.

Ternyata kemahiran pengurusan, perancangan, berani membuat keputusan dan bersuara telah memberi kelebihan buat beliau untuk menonjol dan telah terpilih untuk menjawat jawatan di Volvo dan dapat menyaingi 10 graduan lain yang turut menjalani latihan amali bersama-sama beliau.

Tambah anak kedua daripada empat beradik ini, pilihannya untuk menyambung

pelajaran di UMP merupakan satu langkah yang bijak memandangkan UMP merupakan satu-satunya universiti yang amat menitikberatkan aspek pembelajaran yang praktikal dalam bidang kejuruteraan.

“Apatah lagi saya amat meminati bidang ini dan sering mendapat galakan daripada ibu bapa dan kakak saya di mana mereka juga terdiri daripada jurutera yang hebat di mata saya,” katanya.

Justeru, kami di sidang editorial Create mengucapkan selamat maju jaya kepada beliau dan berharap cita-citanya untuk menubuhkan firma kejuruteraan sendiri tercapai suatu hari kelak.

